

胡適之先生輯

軍國民主義

胡適之題



建國叢書

軍國民詩選

邵元冲選



3 0610 2875 3

軍國民詩選序

中華民族，自黃帝作兵，以弧矢之利威天下，以奠國基，歷紀以來，代著武功。惟以止戈爲武，而神武不殺，爲國民道德之精神，故叛則伐之，服則舍之，是用威德所及，能保世而滋大。平時則以春蒐夏苗秋獮冬狩，以講武事。而射御爲學者所必習，亦以鍛鍊其體力於無事之日，其周詳也如此。後世昧厥本旨，習爲文弱柔脆。一遇危難，非特不能執干戈以捍社稷，卽欲一身一家之自衛，而亦有所不能。是以戎虜間起，則殺人盈城，流血盈野，禍且極於覆國，烏乎，恫矣。夫立國之道，非有自衛禦侮之力，則平時固無以謀安定，臨事亦無以樹安內攘外之効。故曰，天生五材，民並用之，廢一不可，誰能去兵，古訓昭然，可以鑑矣。今國事阽危，戎馬臨郊，非振厲民氣，發憤自勉，則危亡之運，勢將無倖。而振厲民氣

，莫善於樂詩。茲選自秦風無衣爲始，凡歷代忠烈之士，慷慨之辭，採其音節壯烈，詞義激昂者，凡若干首，都爲一編，名之曰軍國民詩選，而詞選附焉。國人誦國殤之詞，念鬼雄之英毅。讀易水之歌，感悲風之蕭瑟。以及張睢陽城守之辭，岳武穆從軍之什，陸放翁愛國之章，文文山正氣之作，以逮從軍出塞諸篇，莫不元氣淋漓，高音朗節，可感可興。烏乎，此皆吾先民大節至性烈魄耿光之所寄，以詔我後人自衛自立雪恥禦侮之道。我國民誦之誦之，再三覆之，倘由是而鼓勵其同仇敵愾之心，以挽回危運，日月重光者，則民族之前途，光榮無限，幸運無限，而我民族列祖列宗之靈，實式憑之矣，是爲序。

中華民國二十二年九月十八日東北四省陷敵之二週年紀念 邵元冲序

軍國民詩選目次

秦風無衣三章

國殤

易水歌

安封侯詩

遠戍勸戒詩

詠懷八十二首錄一

詠荆軻

壯士篇

胡無人行

從軍行

軍國民詩選目次

詩經

楚屈原

燕荆軻

漢崔駰

魏繁欽

阮籍

晉陶潛

張華

梁吳均

劉孝儀

831
329
2

軍國民詩選目次

二

詠霍將軍北伐

虞羲

從北征

北齊祖斑

從軍行

隋明餘慶

從軍行

唐駱賓王

在軍登城樓

前人

將軍行

劉希夷

和陸明府贈將軍重出塞

陳子昂

老將行

王維

贈裴旻將軍

前人

出塞

前人

少年行

前人

燕支行

前人

望薊門

祖詠

出塞

王昌齡

從軍行 選二首

前人

從軍行

李白

西鄙人哥舒歌

前人

塞上曲

前人

經下邳圯橋懷張子房

前人

贈裴將軍

顏真卿

聞笛

張巡

守睢陽作

前人

獻封大夫破播仙凱歌 選三首

岑參

輪臺歌奉送封大夫西征

前人

軍國民詩選目次

走馬川行奉送出師西征

凱歌二首

送渾將將軍出塞

軍城早秋

後出塞 選三首

送李將軍赴定州

塞下曲 二首

征西舊卒

少將

內宴應制

舊將

觀南戍士卒作樂

四

前人

前人

高適

嚴武

杜甫

郎士元

張仲素

許渾

李商隱

宋曹翰

劉鵬

劉敞

防江行 三首

池州翠微亭

題青泥市寺壁

送張紫巖北伐

題驂馬岡

出塞曲

九月十六日夜夢駐軍河外遣使招降諸城覺而有作

聞虜政衰亂掃邊有期喜成口號

塞上曲

雪中忽起從戎之興戲作二首

出塞曲

小出塞曲

劉子翬

岳飛

前人

前人

前人

陸游

前人

前人

前人

前人

前人

前人

軍國民詩選目次

出塞行

羽林郎

正氣歌

讀文山集

題多景樓

自題大義集後

出塞曲

五月調軍入綏甯夜宿風門嶺值雨

讀張巡傳

賜石砮土司秦良玉

大將軍徐丞相平定中原振旅還朝

少年行

六

嚴羽

前人

文天祥

林德暘

鄭思肖

前人

元張琰

陳秀民

周權

明莊烈帝

魏觀

高啓

從軍 選四首

早發清河

早發興河

次永安甸

塞下曲

出塞曲

塞上曲 二首

塞下曲

塞上曲

出塞曲

後出塞

龕山凱歌 選四首

軍國民詩選目次

七

陳汝言

金幼孜

前人

前人

顧璘

王用賓

俞允文

謝榛

胡應麟

前人

陳第

徐渭

軍國民詩選目次

八

宴游爛柯山選三首

前人

出塞曲

左光斗

入塞曲

前人

從軍行

葉重華

寄夫子軍中

汪 嫫

凱歌

何承徽

弔劉道一烈士

民國
先烈黃興

過滎陽楚漢戰蹟弔項羽

吳祿貞

虎牢關

前人

戍邊樓落成登臨有感

前人

秦關道

前人

弔吳烈士樾

秋瑾

觀日俄戰圖有感

感憤

附軍國民詞選目錄

滿江紅

六州歌頭 弔武穆鄂王忠烈廟

沁園春 張路分秋閱作

大江東去 驛中言別友人

滿江紅

滿江紅 懷岳忠武

八聲甘州 榆林塞弔諸忠烈

憶舊游 罷戍歸京寄友

軍國民詩選目次

前人

前人

宋岳飛

劉過

前人

文天祥

明張煌言

前人

屈大均

民國吳祿貞
先烈

軍國民詩選目次

蝶戀花 弔黃花岡

蝶戀花 贈李沛基

一〇

黃興
前人

軍國民詩選

秦風無衣三章

豈曰無衣。與子同袍。王于興師。修我戈矛。與子同仇。
豈曰無衣。與子同澤。王于興師。修我戈戟。與子偕作。
豈曰無衣。與子同裳。王于興師。修我甲兵。與子偕行。

國殤

楚屈原

操吳戈兮被犀甲。車錯轂兮短兵接。旌蔽日兮敵若雲。矢交墜兮士爭先。
陵余陣兮躡余行。左驂殪兮右刃傷。霾兩輪兮繫四馬。援玉枹兮擊鳴鼓。
天時懟兮威靈怒。嚴殺盡兮棄原野。出不入兮往不反。平原忽兮路超遠。
帶長劍兮挾秦弓。首雖離兮心不懲。誠既勇兮又以武。終剛強兮不可陵。
身既死兮神以靈。魂魄毅兮爲鬼雄。



易水歌

燕荆軻

風蕭蕭兮易水寒。壯士一去兮不復還。

安封侯詩

漢崔駰

戎馬鳴兮金鼓震。壯士急兮忘身命。被光甲兮跨良馬。揮長戟兮殲強弩。

遠戍勸戒詩

魏繁欽

肅將王事。集此揚土。凡我同盟。旣文旣武。郁郁桓桓。有規有矩。務在和光。同塵共垢。各竟其心。爲國蕃輔。闇闇行行。非法不語。可否相濟。闕則云補。

詠懷八十二首錄一

阮籍

壯士何慷慨。志欲威八荒。驅車遠行役。受命念自忘。良弓挾烏號。明甲有精光。臨難不顧生。身死魂飛揚。豈爲全軀士。效命爭戰場。忠爲百世榮。義使令名彰。垂聲謝後世。氣節故有常。

詠荆軻

晉陶潛

燕丹善養士。志在報強嬴。招集百夫良。歲暮得荆卿。君子死知己。提劍出燕京。素驥鳴廣陌。慷慨送我行。雄髮指危冠。猛氣衝長纓。飲饒易水上。四座列羣英。漸離擊悲筑。宋意唱高聲。蕭蕭哀風逝。淡淡寒波生。商音更流涕。羽奏壯士驚。心知去不歸。且有後世名。登車何時顧。飛蓋入秦庭。凌厲越萬里。逶迤過千城。圖窮事自至。豪主正怔營。惜哉劍術疎。奇功遂不成。其人雖已沒。千載有餘情。

壯士篇

張華

天地相震蕩。回薄不知窮。人物秉常格。有始必有終。軍時俛仰過。功名宜速崇。壯士懷憤激。安能守虛冲。乘我大宛馬。撫我繁弱弓。長劍橫九野。高冠拂玄穹。慷慨成素霓。嘯咤起清風。震響駭八荒。奮威曜四戎。濯鱗滄海畔。馳騁大漠中。獨步聖明世。四海稱英雄。

胡無人行

梁吳均

劍頭利如芒。恆持照眼光。鐵騎追驍虜。金羈討黠羌。高秋八九月。胡地早風霜。男兒不惜死。破膽與君嘗。

從軍行

劉孝儀

冠軍親挾射。長平自合圍。木落雕弓燥。氣秋征鴈肥。賢王皆屈膝。幕府復申威。何謂從軍樂。往返速如飛。

詠霍將軍北伐

虞羲

擁旄爲漢將。汗馬出長城。長城地勢險。萬里與雲平。涼秋八九月。鹵騎入幽并。飛狐白日晚。瀚海愁雲生。羽書時斷絕。刁斗晝夜驚。乘墉揮寶劍。蔽日引高旂。雲屯七萃士。魚麗六郡兵。胡笳關下思。羌笛隴頭鳴。骨都先自警。日逐次亡精。玉門罷斥堠。甲第始修營。位登萬庾積。功立百行成。天長地自久。人道有虧盈。未窮激楚樂。已見高臺傾。當令麟閣

上。千載有雄名。

從北征

北齊祖 斑

翠旗臨塞道。靈鼓出桑乾。祁山斂雰霧。瀚海息波瀾。戍亭秋雨急。關門朔氣寒。方繫單于頸，歌舞入長安。

從軍行

隋明餘慶

三邊烽亂驚。十萬且橫行。風卷常山陣。笳喧細柳營。劍花寒不落。弓月曉逾明。會取河西地。持作朔方城。

從軍行

唐駱賓王

平生一顧重。意氣溢三軍。野日分戈影。天星合劍文。弓弦抱漢月。馬足踐邊塵。不求生入塞。唯當死報君。

在軍登城樓

前人

城上風威冷。江中水氣寒。戎衣何日定。歌舞入長安。

將軍行

劉希夷

將軍關轅門。耿介當風立。諸將欲言事。逡巡不敢入。劍氣射雲天。鼓聲振原隰。黃塵塞路起。走馬追兵急。彎弓從此去。飛箭如雨集。截圍一百重。斬首五千級。代馬流血死。胡人抱鞍泣。古來養甲兵。有時常討襲。乘我廟堂運。坐使干戈戢。獻凱歸京師。軍容何翕習。

和陸明府贈將軍重出塞

陳子昂

忽聞天上將。關塞重橫行。始返樓蘭國。還向朔方城。黃金裝戰馬。白羽集神兵。星月開天陣。山川列地營。晚風吹畫角。春色耀飛旌。甯知班定遠。猶是一書生。

老將行

王維

少年十五二十時。步行奪取胡馬騎。射殺山中白額虎。肯數鄴下黃鬚兒。一身轉戰三千里。一劍曾當百萬師。漢兵奮迅如霹靂。鹵騎崩騰畏蒺藜。

衛青不敗由天幸。李廣無功緣數奇。自從棄置便衰朽。世事蹉跎成白首。
昔時飛箭無全目。今日垂楊生左肘。路傍時賣故侯瓜。門前學種先生柳。
蒼茫古木連窮巷。寥落寒山對虛牖。誓令疏勒出飛泉。不似潁川空使酒。
賀蘭山下陣如雲。羽檄交馳日夕聞。節使三河募年少。詔書五道出將軍。
試拂鐵衣如雪色。聊持寶劍動星文。願得燕弓射大將。恥令越甲鳴吾軍。
莫嫌舊日雲中守。猶堪一戰立功勳。

贈裴旻將軍

前人

腰間寶劍七星文。臂上琱弓百戰勳。見說雲中擒黠虜。始知天上有將軍。

出塞

前人

居延城外獵天驕。百草連天野火燒。暮雲空磧時驅馬。秋日平原好射鵰。
護羌校尉朝乘幃。破虜將軍夜渡遼。玉靶角弓珠勒馬。漢家將賜霍嫖姚。

少年行

前人

一身能擘雨彫弧。虜騎千重只似無。偏坐金鞍調白羽。紛紛射殺五單于。

燕支行

前人

漢家天將才且雄。時來謁帝明光宮。萬乘親推雙闕下。千官出餞五陵東。
誓將甲第金門裏。身作長城玉塞中。衛霍纔堪一騎將。朝廷不數貳師功。
趙魏燕韓多勁卒。關西俠少何咆勃。報讎只是聞嘗膽。飲酒不曾妨刮骨。
畫戟雕戈白日寒。連旗大旆黃塵沒。疊鼓遙翻瀚海波。鳴笳亂動天山月。
麒麟錦帶佩吳鉤。颯沓青驪躍紫騮。拔劍已斷天驕臂。歸鞍共飲月支頭。
漢兵大呼一當百。鹵騎相看哭且愁。教戰雖令赴湯火。終知上將先伐謀。

望薊門

祖詠

燕臺一去客心驚。簫鼓喧喧漢將營。萬里寒光生積雪。三邊曙色動危旌。
沙場烽火連胡月。海畔雲山擁薊城。少小雖非投筆吏。論功還欲請長纓。

出塞

王昌齡

秦時明月漢時關。萬里長征人未還。但使龍城飛將在。不教胡馬度陰山。

從軍行選二首

前人

青海長雲暗雪山。孤城遙望玉門關。黃沙百戰穿金甲。不破樓蘭終不還。
大漠風塵日色昏。紅旗半捲出轅門。前軍夜戰洮河北。已報生擒吐谷渾。

從軍行

李白

百戰沙場碎鐵衣。城南已合數重圍。突營射殺呼延將。獨領殘兵千騎歸。

西鄙人哥舒歌

前人

北斗七星高。哥舒夜帶刀。至今窺牧馬。不敢過臨洮。

塞上曲

前人

大漠無中策。匈奴犯渭橋。五原秋草綠。塞馬一何驕。命將征西極。橫行
陰山側。燕支落漢家。婦女無顏色。轉戰渡黃河。休兵樂事多。蕭條清萬
里。瀚海寂無波。

經下邳圯橋懷張子房

前人

子房未虎嘯，破產不爲家。滄海得壯士。椎秦博浪沙，報韓雖不成。天地皆震動。潛匿游下邳。豈曰非智勇。我來圯橋上。懷古欽英風。惟見碧流水。曾無黃石公。嘆息此人去。蕭條徐泗空。

贈裴將軍

顏真卿

大軍制六合。猛將清九垓。戰馬若龍虎。騰凌何壯哉。將軍臨八荒。烜赫耀英材。劍舞若游電。隨風縈且迴。登高望天山。白雲正崔巍。入陣破強寇。威名雄震雷。一射百馬倒。再射萬夫開。匈奴不敢敵。相呼歸去來。功成報天子。可以畫麟臺。

聞笛

張巡

岩嶢試一臨。敵騎附城陰。不辨風塵色。安知天地心。營開邊月近。戰苦陣雲深。旦夕更樓上。遙聞橫笛音。

守睢陽作

前人

接戰春來苦。孤城日漸危。合圍侔月暈。分守若魚麗。屢厭黃塵起。時將白羽揮。裹瘡猶出陣。飲血更登陴。忠信應難敵。堅貞諒不移。無人報天子。心計欲何施。

獻封大夫破播仙凱歌選三首

岑參

官軍西出過樓蘭。營幕旁臨月窟寒。蒲海曉霜凝馬尾。蔥山夜雪撲旌竿。鳴笳疊鼓擁回軍。破國平蕃昔未聞。丈夫鵠印搖邊月。大將龍旗掣海雲。日落轅門鼓角鳴。千羣面縛出蕃城。洗兵魚海雲迎陣。秣馬龍堆月照營。

輪臺歌奉送封大夫出師西征

前人

輪臺城頭夜吹角。輪臺城北旄頭落。羽書昨夜過渠黎。單于已在金山西。戍樓西望煙塵黑。漢兵屯在輪臺北。上將擁旄西出征。平明吹笛大軍行。四邊伐鼓雪海湧。三軍大呼陰山動。虜塞兵氣連雲屯。戰場白骨纏草根。

劍河風急雪片闊。沙口不凍馬蹄脫。亞相勤王甘苦辛。誓將報主靜邊塵。
古來青史誰不見。今見功名勝古人。

走馬川行奉送出師西征

前人

君不見走馬川行雪海邊。平沙莽莽黃入天。輪臺九月風夜吼。一川碎石大
如斗。隨風滿地石亂走。匈奴草黃馬正肥。金山西見煙塵飛。漢家大將西
出師。將軍金甲夜不脫。夜半軍行戈相撥。風頭如刀面如割。馬毛帶雪汗
氣蒸。五花連錢旋作冰。幕中草檄硯水凝。虜騎聞之應膽攝。料知短兵不
敢接。車師西門竚獻捷。

凱歌二首

前人

蕃軍遙見漢家營。滿谷連山徧哭聲。萬箭千刀一夜殺。平明流血浸空城。
暮雨旌旗濕未乾。胡塵白草日光寒。晚夜將軍連宵戰。蕃軍只見馬空鞍。

送渾將軍出塞

高適

將軍族貴兵且強。漢家已是渾邪王。子孫相承在朝野，至今部曲燕支下。
控弦盡用陰山兒。登陣長騎大宛馬。銀鞍玉勒繡螭弧。每逐嫖姚破骨都。
李廣從來先將士。衛青未肯學孫吳。傳有沙場千萬騎。昨日邊庭羽書至。
城頭畫角三四聲。匣裏寶刀晝夜鳴。意氣能甘萬里去。辛勤動作一年行。
黃雲白草無前後。朝建旌旄夕刁斗。塞下應多俠少年。關西不見春楊柳。
從軍借問所從誰。擊劍酣歌當此時。遠別無輕繞朝策。平戎早寄仲宣詩。

軍城早秋

嚴武

昨夜秋風入漢關。朔雲邊月滿西山。更催飛將追驕虜。莫遣沙場匹馬還。

後出塞選三首

杜甫

男兒生世間。及壯當封侯。戰伐有功業。焉能守舊丘。召募赴薊門。軍動不可留。
千金買馬鞍。百金裝刀頭。閭里送我行。親戚擁道周。班白居上列。酒酣進庶羞。
少年別有贈。含笑看吳鉤。

朝進東門營。暮上河陽橋。落日照大旗。馬鳴風蕭蕭。平沙列萬幕。部伍各見招。中天懸明月。令嚴夜寂寥。悲歎數聲動。壯士慘不驕。借問大將誰。恐是霍嫖姚。

古人重守邊。今人重高勳。豈知英雄主。出師互長雲。六合已一家。四裔且孤軍。遂使貔虎士。奮身勇所聞。拔劍擊大荒。日收邊馬羣。誓開元冥北。持以奉吾君。

送李將軍赴定州

耶士元

雙旌漢飛將。萬里獨橫戈。春色臨關盡。黃雲出塞多。鼓鼙悲絕漠。烽戍隔長河。想到陰山北。遐荒已請和。

塞下曲二首

張仲素

三戍漁陽再度遼。驛弓在臂箭橫腰。匈奴似欲知名姓。休傍陰山更射鵰。獵馬千行雁幾雙。燕然山下碧油幢。傳聲漠北單于破。火照旌旗夜受降。

征西舊卒

許渾

少來乘勇氣。百戰過烏孫。力靖邊城難。功加上將恩。曉風聽戍角。殘月倚營門。自說輕生處。金瘡有舊痕。

少將

李商隱

族亞齊安陸。風高漢武威。煙波別墅醉。花月後門歸。青海聞傳箭。天山報合圍。一朝攜劍起。馬上疾如飛。

內宴應制

朱曹翰

三十年前學六韜。英名常得預時髦。曾因國難披金甲。不爲家貧賣寶刀。臂健尙嫌弓力軟。眼明猶識陣雲高。庭前昨夜秋風起。羞見團花舊戰袍。

舊將

劉隲

強弩當年討不庭。功成身退炳丹青。囊沙澤畔知兵法。聚米山前識陣形。驥老未甘秋伏櫪。劍閒猶覺夜衝星。分茅錫土傳家牒。鐘鼎還須爲勒銘。

觀南戍士卒作樂

劉敞

簫鼓軍中樂。旌旗歲晚過。激昂雙劍舞。慷慨萬人歌。睥睨荊衡小。騰波虎兕多。北風隨殺氣。橫絕洞庭波。

防江行三首

劉子翬

朝來殺氣秋。千里無立草。翩翩黑幟飛。結壘天長道。獵罷楚天寒。黃雲淡如掃。

漢家飛將雄。夜戰蕪城北。雙刀斫盡。剗月暗穿圍出。低頭拔胡箭。却向胡軍射。

寒烽隔水明。虜意猶叵測。君王自臨戎。萬騎隨征蹕。士氣薄層霄。機槍夜無色。

池州翠微亭

岳飛

經年塵土滿征衣。特特尋芳上翠微。好水好山看不足。馬蹄催趁月明歸。

題青泥市寺壁

前人

雄氣堂堂貫斗牛。誓將直節報君讐。斬除頑惡還車駕。不問登壇萬戶侯。

送張紫巖北伐

前人

號令風雷迅。天聲動北陬。長驅渡河洛。直擣向燕幽。馬喋閼氏血。旗臬可汗頭。歸來報明主。恢復舊神州。

題驟馬岡

前人

立馬林岡豁戰眸。陣雲開處一溪流。機春水泚猶傳晉。黍秀宮廷孰憫周。南服只今殲小醜。北轅何日返神州。誓將七尺酬明聖。怒指天涯淚不收。

出塞曲

陸游

千騎爲一隊。萬騎爲一軍。朝踐狼山雪。莫宿榆關雲。將軍羽箭不虛發。直到祁連無雁羣。鑿鑿春雷收陣鼓。蜿蜿驚蛇射生弩。漢蕃遺民立道邊。白髮如霜淚如雨。褫魄胡兒作窮鼠。競裹胡頭改胡語。陣前乞降馬前舞。檄書夜入黃龍府。

九月十六日夜夢駐軍河外遣使招降諸城覺而有作

前人

殺氣昏昏橫塞上。東竝黃河開玉帳。晝飛羽檄下列城。夜脫貂裘撫降將。
將軍櫪下汗血馬。猛士腰間虎文韞。階前白刃明如霜。門外長戟森相向。
朔風卷地吹急雪。轉盼玉花深一丈。誰人鐵衣冷徹骨。感義懷恩如挾纊。
腥臊窟穴一洗空。太行北嶽元無恙。更呼斗酒作長歌。要遣天山健兒唱。

聞虜政衰亂掃蕩有期喜成口號

前人

遺虜遊魂豈足憂。漢家方運幄中籌。天開地闢逢千載。雷動風行遍九州。
刁斗令嚴青海夜。旌旗色照鐵關秋。功名自是英豪事。不用君王萬戶侯。

塞上曲

前人

老矣猶思萬里行。翩然上馬始身輕。玉關去路心如鐵。把酒何妨聽渭城。

雪中忽起從戎之興戲作二首

前人

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

羣胡束手仗天亡。棄甲縱橫滿戰場。雪上急追犇馬迹。官軍夜半入遼陽。

出塞曲

前人

佩刀一刺山爲開。壯士大呼城爲摧。三軍甲馬不知數。但見動地銀山來。
長戈逐虎祁連北。馬前曳來血丹臆。却回射鴈鴨綠江。箭飛鴈起連雲黑。
清泉茂草下程時。野帳牛酒爭淋漓。不學京都貴公子。唾壺塵尾事兒嬉。

小出塞曲

前人

全師出鴈塞。百戰運龍韜。金絡洮州馬。珠裝夏國刀。度沙風破肉。攻壘
雪平壕。明日受降處。甲齊熊耳高。

出塞行

嚴羽

將軍救朔邊。都護上祁連。六郡飛傳檄。三河聚控弦。連營當太白。吹角
動胡天。何日匈奴滅。中原能晏然。

羽林郎

前人

貂帽狐裘塞北妝。黃鬚年少羽林郎。彎弓不怕天山雪。生縛名王入建章。

正氣歌

文天祥

天地有正氣。雜然賦流形。下則爲河嶽。上則爲日星。於人曰浩然。沛乎塞蒼冥。皇路當清夷。含和吐明庭。時窮節乃見。一一垂丹青。在齊太史簡。在晉董狐筆。在秦張良椎。在漢蘇武節。爲嚴將軍頭。爲嵇侍中血。爲張睢陽齒。爲顏常山舌。或爲遼東帽。清操厲冰雪。或爲出師表。鬼神泣壯烈。或爲渡江楫。慷慨吞胡羯。或爲擊賊笏。逆豎頭破裂。是氣所磅礴。凜烈萬古存。當其貫日月。生死安足論。地維賴以立。天柱賴以尊。三綱實繫命。道義爲之根。嗟予遘陽九。隸也實不力。楚囚纓其冠。傳車送窮北。鼎鑊甘如飴。求之不可得。陰房闔鬼火。春院閤天黑。牛驥同一皁。雞棲鳳凰食。一朝蒙霧露。分作溝中瘠。如此再寒暑。百沴自辟易。哀哉沮洳場。爲我安樂國。豈有他繆巧。陰陽不能賊。顧此耿耿在。仰視

浮雲白。悠悠我心憂。蒼天曷有極。哲人日已遠。典型在夙昔。風檐展書讀。古道照顏色。

讀文山集

林德陽

黑風夜撼天柱折。萬里飛塵九溟竭。誰欲扶之兩腕絕。英淚浪浪滿襟血。龍庭戈鋌爛如雪。孤臣生死早已決。綱常萬古懸日月。百年身世輕一髮。苦寒尙握蘇武節。垂盡猶存杲卿舌。膝不可下頭可截。白日不照吾忠切。哀鴻上訴天欲裂。一編千載虹光發。書生倚劍歌激烈。萬壑秋聲助幽咽。世間淚灑兒女別。大丈夫心一寸鐵。

題多景樓

鄭思肖

英雄登眺處。一劍獨來遊。男子抱奇氣。中原入遠謀。江分淮浙土。天闊楚吳秋。試望斜陽外。誰寬西顧憂。

自題大義集後

前人

長夜漫漫發浩歌。生民塗炭果如何。中興車馬修攘在。變雅君臣廢缺多。
赤幟開明新日月。青氈恢拓舊山河。誓崇忠義清姦逆。田海雖遷志不磨。

出塞曲

元張琰

腰間插雄劍。中夜龍泉吼。平明登前途。萬里不回首。男兒當野死。豈爲
印如斗。忠誠表壯節。燦爛千古後。

朝發山陽去。暮宿清水頭。上馬左右射。捷下如獼猴。先發服勇決。手提
血鬪髀。兵家互勝負。凡百慎先籌。

五月調軍入綏甯夜宿風門嶺值雨

陳秀民

五月官軍入不毛。重岡複嶺接天高。小臣報國甯辭死。大將行兵無乃勞。
漠漠野煙啼魍魎。陰陰山木掛猿猱。二更風雨來關峽。自喜挑燈看寶刀。

讀張巡傳

周權

我懷張睢陽。厲節剛不吐。妖氛暗禹縣。奮迅提虎旅。憑城怒裂眦。忠勇

激肺腑。擐甲四百戰。奇功不可數。江淮卒保障。藉此奠唐土。可憐將孤軍。機勢已莫禦。食盡兵亦窮。愛妾入鼎釜。雷南空桓桓。餘勇不可賈。身城遂俱亡。大義著君父。人孰不能守。公守以死拒。人孰不有死。公死乃其所。繁霜表貞松。迅水知砥柱。當時儉生輩。澳忍猶妾婦。青燈撫遺編。英氣凜千古。

賜石碣土司秦良玉

明莊烈帝

蜀錦征袍手製成。桃花馬上請長纓。世間不少奇男子。誰肯沙場萬里行。

大將軍徐丞相平定中原振旅還朝上御龍江亭命儒臣賦詩迎之應制

魏觀

白旄黃鉞兩京平。甘雨和風四海清。師出萬全非用武。將資三傑在推誠。蒼髯挾雨迎車騎。彩鳳穿雲送旆旌。獻頌偶蒙天一笑。行看作樂著功成。

少年行

高啓

下直平明出禁門。笑提博局伴王孫。寶刀不敢輕輸却。明日沙場欲報恩。

從軍選四首

陳汝言

我非將門子。生本良家兒。少年事馳騁。射獵南山陲。邦家有急難。詔書下丹墀。跨馬出門去。立身當及時。

去年滅龜茲。今年斬樓蘭。不憂道里遠。但念衣裳單。北風捲沙雪。淒淒日夜寒。安邊在今日。焉敢辭苦難。

將以勇而決。兵以練而精。信賞乃必罰。置死而後生。勿云古人長。勿視今人輕。一念苟忠義。活人有令名。

下馬滄海頭。磨洗刀上血。翻思殺敵時。奮勇肝膽熱。丈夫身許國。此心久已決。生當樹功勳。死當立忠節。

早發清河

金幼孜

海色正蒼涼。龍旂拂曙光。彫戈寒映日。羽箭薄凝霜。城闕雲中近。關山

笛裏長。天兵隨殺氣。萬里掃機槍。

早發興和

前人

未曉戒嚴程。鳴弓度塞城。川雲隨地起。野火雜星明。虎旅聽笳動。鸞旗傍蹕行。草青沙路輦。渾覺馬蹄輕。

次永安甸

前人

大幕塵清虜氣摧。六師奏凱六龍迴。妖氛掃地旄頭滅。御氣浮空雉尾來。武帳平臨天漢迥。戍樓遙傍朔雲開。行人笑指京華近。北望紅雲擁上台。

塞下曲

顧璘

千里驂騮丈八矛。男兒畫地取封侯。黃昏塞上傳烽火。一夜吹笳坐戍樓。

出塞曲

王用賓

賀蘭山下羽書飛。廣武營中戰馬肥。壯士爭誇神臂弩。打圍先射白狼歸。

塞上曲二首

俞允文

葱關雪淨月蕭蕭。大將功成玉帳高。天馬不愁西極遠。上林新種紫葡萄。金鞍玉勒控龍媒。淬水芙蓉對日開。兵氣盡成煙霧起。夜深新破右賢來。

塞下曲

謝榛

青海城邊秋草稀。黃沙磧裏夜雲飛。將軍不寐聽刁斗。月上轅門探馬歸。

塞上曲

胡應麟

紫電花驄白玉鞭。遠從都護出居延。清秋不辨龍城色。一片黃雲瀚海間。

出塞曲

前人

大獵漁陽罷。椎牛上谷營。酒闌飛騎去。夜奪受降城。

後出塞

陳第

萬里秋風海上生。驅車今復戍檀城。天寒夜渡韋溝水。馬尾凝冰碎有聲。

龔山凱歌選四首

徐渭

短劍隨鎗暮合圍。寒風吹血著人飛。朝來道上看歸騎。一片紅冰冷鐵衣。

七尺龍蟠皂線絛。倭兒刀掛漢兒腰。向誰手內親捎得。百遍衝鋒滾海蛟。
無首有身祇自猜。左啼魂魄右啼骸。憑將老譯傳番語。此地他生敢再來。
旗裏金瘡碎朔風。軍中吮卒有吳公。更教廝養眠營竈。自向霜槽喂鐵驄。

宴游爛柯山選三首

前人

萬山松柏遶旌旗。少保南征暫駐師。接得羽書知賊破。爛柯山下正圍碁。
偏裨結束佩刀弓。道上逢迎抹首紅。夜雪不勞元帥入。先擒賊將出洄中。
羣兇萬隊一時平。滄海無波嶺瘴清。帳下共推擒虎將。江南只數義烏兵。

出塞曲

左光斗

陣雲橫卷將星高。獵獵秋風動羽旄。揚旆平明屯渭北。銜枚薄暮度臨洮。

入塞曲

前人

大漠空高塵不飛。新秋塞上草猶肥。石榴紅綻葡萄紫。博望遙馳宛馬歸。

從軍行

葉重華

吳鉤雪色滿天山。血戰黃沙萬里還。但願畫圖麟閣上。不須生入玉門關。

寄夫子軍中

汪 葵

武士好言兵。赳赳輒攘臂。此事談何易。古聖猶惴惴。大氣養浩然。鋒端君子避。運用具全神。謹慎第一義。野戰未可非。將步兼將騎。所虞驕易敗。禍每生得意。智名與勇功。豈堪膺閫寄。聲色不動中。能肩天下事。

凱歌

何承徽

榆柳蕭蕭大漠寒。金貂飛尉舊登壇。寶刀染得單于血。鼓吹天兵下賀蘭。

弔劉道一烈士

民國先烈黃 興

英雄無命哭劉郎。慘澹中原俠骨香。我未吞胡恢漢業。君先懸首看吳荒。啾啾赤子天何意。獵獵黃旗日有光。眼底人才思國土。萬方多難立蒼茫。

過滎陽楚漢戰蹟弔項羽

吳祿貞

征途躍馬走滎陽。東京西索水茫茫。形勝巍然多絕壁。楚漢分爭古戰場。

秦皇雄圖併六國。遽使英雄成霸業。漫笑風雲爭豎子。項王畢竟人中傑。
書不讀。劍不學。祇憑豪氣凌霄漢。漢高聞名膽爲落。鴻門會上何其雄。
八千子弟氣如虹。七十一戰無不利。天下無敢撓其鋒。滎陽城外楚歌激。
不信漢軍環四壁。大聲狂呼戰無罪。英雄獨對烏江泣。嗚乎。堪嘆項王失
敗處。萬人何足稱勁敵。蕭蕭京索水聲悲。土暈落花殷戰蹟。願率中原強
健兒。爲君一掃傷心迹。

虎牢關

前人

山峯聳翠接雲寰。傳聞此是虎牢關。北倚黃河南汜水。有如一綫環其間。
晉人城此爭鄭國。幾次戍兵稱要阨。中原逐鹿古戰場。悲風千里餘腥血。
戰死鬼雄何足慨。茫茫白骨今猶在。默祝忠魂古健者。同我再上龍沙塞。

戍邊樓落成登臨有感

前人

籌邊我亦起高樓。極目星關次第收。萬里請纓歌出塞。十年磨劍笑封侯。

鴻溝浪盡金甌固。雁磧風高鐵騎愁。西望白山雲氣渺。圖們江上自悠悠。

秦關道

前人

滔滔黃河水。崎嶇秦關道。西征心事急。馬蹄蹈秋草。功名立異域。何用歎衰老。桑榆圖補救。爲計恨不早。班張通西域。史蹟猶可考。羌虜破膽否。長劍是吾寶。

弔吳烈士樾

秋瑾

崑崙一脈傳驕子。二百餘年漢聲死。低頭異族胡衣冠。腥膻污人祖宗恥。忽地西來送警鐘。漢人聚哭崑崙東。方知今日豚尾子。不是當年漢大風。裂眦嚙指爭傳檄。大叫同胞聲激烈。積恥從頭洗速清。還我堂堂黃帝裔。大江南北羣相和。英雄爭挽魯陽戈。盧梭文筆波蘭血。拚把頭顱換鐃歌。年年歲月駒馳隙。有漢光復總無策。志士奮叫東海東。胡兒虎踞北京北。苦我同胞意未同。徒勞流血嘆無功。提防家賊計何酷。憤起英雄出皖中。

皖中有士名吳樾。百練鋼腸如火熱。報仇直以酬祖宗。殺賊計先除羽翼。
爆血同拚殲賊臣。男兒愛國已忘身。可憐懜懜天意瞽。致使英雄志未伸。
電傳噩耗風潮聳。同志相顧皆色動。打破從前奴隸關。驚回大地繁華夢。
死殉同胞剩血痕。我今痛哭爲招魂。前仆後繼人應在。如君不愧軒轅孫。

觀日俄戰圖有感

前人

萬里乘風去復來。隻身東海挾春雷。忍看圖畫移顏色。肯使江山付劫灰。
濁酒難消憂國淚。救時須仗出羣材。拚將十萬頭顱血。須把乾坤力挽回。

感憤

前人

莽莽神州歎陸沉。救時無計愧偷生。搏沙有願興亡楚。博浪無錐擊暴秦。
國破方知人種賤。義高不礙客囊貧。經營恨未酬同志。把劍悲歌涕淚橫。



附軍國民詞選

滿江紅

宋岳飛

怒髮衝冠。憑欄處、瀟瀟雨歇。抬望眼、仰天長嘯。壯懷激烈。三十功名塵與土。八千里路雲和月。莫等閒、白了少年頭。空悲切。靖康恥。猶未雪。臣子恨。何時滅。駕長車、踏破賀蘭山缺。壯志飢餐胡虜肉。笑談渴飲匈奴血。待從頭、收拾舊山河。朝天闕。

六州歌頭

弔武穆鄂王忠烈廟

劉過

中興諸將。誰是萬人英。身草莽。人雖死。氣填膺。尙如生。年少起河北。劔三尺。弓兩石。定襄漢。開虢洛。洗洞庭。北望帝京。狡兔依然在。良犬先烹。過舊時營壘。荆鄂有遺民。憶故將軍。淚如傾。說當年事。知恨苦。不奉詔。僞耶眞。臣有罪。陛下聖。可鑒臨。一片心。萬古分茅。

土。終不到舊姦臣。人世猶白日照。忽開明。袞佩冕圭百拜。九原下榮感君恩。看年年三月。滿地野花春。鹵簿迎神。

沁園春張路分秋閣作

前人

萬馬不嘶。一聲寒角。令行柳營。見秋原如掌。鎗刀突出。星馳鐵騎。陣勢縱橫。人在油幢。我韜總制。羽扇從容裘帶輕。君知否。是山西將種。曾繫詩名。龍蛇紙上飛騰。看落筆四簷風雨驚。便塵沙出塞。封侯萬里。印金如斗。未愜平生。拂拭腰間。吹毛劍在。不斬樓蘭心不平。歸來晚。聽隨車鼓吹。也帶邊聲。

大江東去驛中言別友人

文天祥

水天空闊。恨東風不借。世間英物。蜀鳥吳花殘照裏。忍見荒城頽壁。銅雀春情。金人秋淚。此恨憑誰雪。堂堂劍氣。斗牛空認奇傑。那信江海餘生。南行萬里。送扁舟齊發。正爲鷗盟留醉眼。細看濤生雲滅。睨柱吞

羸。回旗走懿。千古衝冠髮。伴人無寐。秦淮應是孤月。

滿江紅

明張煌言

蕭瑟風雲。埋沒盡英雄本色。最髮指駝酥羊酪。故宮舊闕。青山未築祁連冢。滄海猶銜精衛石。又誰知鐵馬也耶當。弔弓折。誰討賊。顏卿檄。誰抗虜。蘇卿節。拚三台墜紫。九京藏碧。燕語呢喃新舊雨。雁聲嘹唳興亡月。怕他年西台慟哭人。淚成血。

滿江紅

懷岳忠武

前人

屈指興亡。恨南北黃圖銷歇。便幾個孤忠大義。冰清玉烈。趙信城邊羌笛雪。李陵台上胡笳月。慘模糊吹出玉關情。聲淒切。漢宮露。梁園雪。雙龍逝。一鴻滅。賸逋臣怒擊。唾壺皆缺。豪傑氣吞白鳳體。高懷背飲黃羊血。試排雲待把捧日心。訴金闕。

八聲甘州

榆林塞弔諸忠烈

屈大均

大黃河萬里捲沙來。沙高與城平。教紅城明月。白城積雪。兩不分明。恨絕當年搜套。大舉事無成。長把秦時塞。付與笳聲。最好榆林雄鎮。似駱駝橫臥。人馬皆驚。更家家飛將。生長有威名。爲黃巾全膏原野。與玉顏三萬血花腥。忠魂在。願君爲厲。莫逐流螢。

憶舊游 罷戍歸京寄友

民國先烈吳祿貞

十年離別苦。滿腔情緒。同是天涯。憶楚王台下。狂歌擊劍。豪氣堪嗟。九邊處處蹏痕。飛夢逐龍沙。往事話淒涼。長城萬里。幾處悲笳。榆關獨立久。望渤海遼陽。落日西斜。戰血餘腥在。念匈奴未滅。何以爲家。春風吹斷秋草。趁大好韶華。數出塞征鴻。沈暮色。笑歸鴉。

蝶戀花 弔黃花崗

黃興

轉眼黃花看發處。爲囑西風暫把香籠住。待灑滿枝清豔露。和香吹上無情墓。回首羊城三月暮。血肉紛飛氣直吞狂虜。事敗垂成原鼠子。英雄地

下長無語。

蝶戀花 贈李沛基

前人

華舸天風吹客去。一段新秋不誦新詞句聞。道高樓人獨住。感懷定有登臨賦。昨夜晚涼添幾許。夢枕驚回獨自思君語。不道珠江行役苦。祇憂博浪椎難鑄。

表 期 刊 書 信



中華民國二十二年十月十月初版

軍國民詩選

(每冊定價大洋三角)

(外埠酌加郵費匯費)

版權所有

選輯者 邵元冲

發行者兼印刷者 建國月刊社

南京成賢街一〇一號

發行所 建國月刊社

南京成賢街一〇一號

